

# 《聖般若波羅蜜多心經》

〔古印度〕紮夏薩生論師

(一) 般若之名	聖般若波羅蜜多心經
(二) 因緣	如是我聞，一時薄伽梵住王舍城鷲峯山中，與大苾芻眾，及諸菩薩摩訶薩俱。
(三) 入定	爾時世尊等入甚深明了三摩地法之異門。
(四) 論議	復於爾時，觀自在菩薩摩訶薩，行深般若波羅蜜多時，觀察照見五蘊體性，悉皆是空。
(五) 趣入般若	時具壽舍利子，承佛威力，白聖者觀自在菩薩摩訶薩曰：若善男子，欲修行甚深般若波羅蜜多者，復當云何修學，作是語已。
(六) 般若之相	觀自在菩薩摩訶薩答具壽舍利子言： 若善男子及善女人，欲修行甚深般若波羅蜜多者，彼應如是觀察，五蘊體性皆空， 色即是空，空即是色，色不異空，空不異色，如是受想行識，亦復如是。
(七) 般若之所行境	是故舍利子，一切法空性，無相無生無滅，無垢離垢，無減無增。 舍利子，是故爾時空性之中，無色，無受，無想，無行，亦無有識。無眼，無耳，無鼻，無舌，無身，無意。無色，無聲，無香，無味，無觸，無法。無眼界，乃至無意識界。 無無明，亦無無明盡，乃至無老死，亦無老死盡。無苦集滅道。無智無得，亦無不得。
(八) 般若之功德	是故舍利子，以無所得故，諸菩薩眾，依止般若波羅蜜多，心無障礙，無有恐怖，超過顛倒，究竟涅槃。
(九) 般若之果	三世一切諸佛，亦皆依般若波羅蜜多故，證得無上正等菩提。
(十) 般若密咒	舍利子，是故當知般若波羅蜜多大密咒者，是大明咒，是無上咒，是無等等咒，能除一切諸苦之咒，真實無倒。故知般若波羅蜜多，是秘密咒。 即說般若波羅蜜多咒曰： 娑帝娑帝，波囉娑帝，波囉僧娑帝，菩提莎訶。 舍利子，菩薩摩訶薩，應如是修學甚深般若波羅蜜多。 爾時世尊從彼定起，告聖者觀自在菩薩摩訶薩曰： 善哉善哉，善男子，如是如是，如汝所說，彼當如是修學般若波羅蜜多，一切如來，亦當隨喜。 時薄伽梵說是語已，具壽舍利子，聖者觀自在菩薩摩訶薩，一切世間天人阿蘇羅乾闥婆等，聞佛所說，皆大歡喜，信受奉行。